

四庫全書

集部

欽定四庫全書

集部

唐愚士詩卷四

詳校官編修臣曹城

中書臣劉源溥覆勘

總校官進士臣朱鈐

校對官助教臣羅萬選

謄錄監生臣羅翺遠

欽定四庫全書

唐愚士詩卷三

明 唐之淳 撰

安山驛

地凍河水涸北風吹衣裳
豈但歲月晚所思道路長
昨日安山湖湖流浩湯湯
今朝安山驛河淺失故常
辛勤自茲始艱險亦備嘗
三朝歷半里五日一舍強
呌呼錯昏旦面日無精光
船人赤脚泣行子中夜傷
赤脚水破

骨夜傷悲故鄉

決河

近年黃河決其半民所居高者為洲渚下者為沮洳昔
逢禾與麻今見鼉與魚園廬盡漂蕩桑棗遺朽株尚留
水中央撐拄不可除叅錯犬牙峙纍纍星斗如舟行一
有過墊沒無復餘我昨經春初瀰漫若江湖及還值冬晏
水縮成丘墟我舟既已膠我僕亦已痛漚觴禱河伯利
涉期無虞

鄆城縣

夜聽墻下雞曉掃墻上霜雞啼霜正白繁星粲成章維
茲古鄆城廢塔河水傍亦復有民社雞犬聲相望我舟
泊已久徒旅行未遑回瞻百里間形勢轉倉皇悶來走
平陸臨眺齊魯疆汶濟日夜去青徐互低昂泰山嶽所
尊鳧繹聖之邦歸田事則遠懷古心孔傷

曉起

鷄犬吠荒村靈雞送曉暾風嚴銷酒色河漲沒沙痕黑

金日乃公三
卷三
處山峯遠青邊野燒繁朝來日南至倚櫺憶家園

長至日

一年時序總途中

正旦元宵在杭州花朝在滁陽清明兩河口端午到大寧夏至六王川中

秋留薊門重九寓北平皆客中

古鄆城中復遇冬漫把詩篇供物色惟

憑酒力破塵容船頭月落長亭鼓河面風傳遠寺鐘自
嘆身隨戎馬後故山春事負耕農

夢北郭生

濟寧道中

美人星冠雲綺裳自我不見今三霜常時開口詠鳳凰

律中角徵宮羽商江妃河伯權相將山鬼木魅無精光
俄然一斥萬里鄉十口奔馳饑無糠昆明池寒荷葉黃
椒花瘴重餐楓香昨夢遇之天北方手斟瓊漿在我傍
或被短髮涕泗滂人耶鬼耶杳莫詳有魚不得升天潢
有鴈不得過衡陽此生已矣空慄傷他生尚卜同翱翔
圈里村

曉望嘉祥山晚投孫家圈墟曲烟火亂天高雲景鮮道
旁一廢碑糾結苔蔓纏知是古鄉校篆筆有瑤鐫況茲

鄒魯邦文物自古先云何喪亂後俎豆沒戈鋌當時揖讓地草木牛羊羶方今際文明百舉無棄捐子產如可作諸生思執鞭

懷鄉中馬蔡三友生

十一月十日沛縣作

分首春燈後懷人臘雪邊河山經沛邑行李滯樓船茗煮瓊芽嫩醅浮綠螳圓此期知不遠歸及燕鶯天

古碣時時讀長河處處通所嗟行役地不與故人同雀啁深愁雪魚吹細起風尺書雖滿紙鴻鴈幾曾逢

沛縣

順流兼長風，席挂風轉急。
雲寒景色晏，人遠鷗鷺集。
久行厭風水，數日臨險澁。
逆浪側倒翻，狀如沙流入。
睢盱勞頸脰，頽倚若維繫。
幸此天意泛，談笑開快悒。
眼明清鏡朗，思湧源泉汲。
谷亭回首遥，豐沛行將及。
山殘王氣歇，牛卧角濺濺。
巍然歌風臺，于以覽原隰。

夾溝驛待後船不至

待船兩河口，沽酒夾溝邊。
羈旅身如病，淹留日似年。
層

冰因雪急破浪得風偏京國三千里蟾蜍兩度圓

東昌得家書

七月家書遠使將那知今夜泊東昌朝來曾與家人說
蠟燭開花鵲噪檣

徐州

前舟及彭城後舟過豐沛河水堅無聲相隔兩舍內舍
舟輕覓車累日不得至欲飛乏羽翼欲渡安能濟朝登
拖樓望林壑聳晴翠山中幾陳蹟一一皆可喟到今飛

鳥盡何以留淹滯重懷眉山翁文治今誰繼

秦梁洪

前月公使還送之聊城東今日公使出遇之秦梁洪公
如虬與龍來往無定蹤我如萍與蓬流轉何終窮淹留
千里內再得仰音容下馬野人家星稀月當空山爐熟
枯桑土甑炊新春問言及母妻慙勤慰冲冲復許還故
鄉送之以僕僮期以閱歲見鐙罷桃花紅一飯恩必酬
禽魚戀淵叢明日車馬異天涯矯冥鴻

黃樓

十一月十七日為船凍
登車以下皆車中作

東方明未明殘月光
睖睖首路黃樓南樓鼓聲統統我
來何苦難日月徒荏苒川行無全功
陸涉此其漸橋危
驚路折牛顫畏坡險僕夫又已病
衣破脰不掩風淒手足皴霜重
語音慘我非肉食者安坐敢自憊

宿州

我車何噶噶駕出城東門城小州事殷
應答民力煩夕
驅荒莊北香山含半醺莽然百里內
宿草蔓平原前經

石橋阻始見雞狗喧又聞衡門下兒童誦王言土儒不識字訓解失本源下車使之前父老咸駭奔重為正譌
舛欽哉期勿諉

固鎮

匯河鎮門東河水清如苔其原發湖澗其流入長淮是日天氣和惜此風日佳試臨清泠淵洗我骭髀懷漁人四五舟中流正徘徊時復發清嘯白鷗無驚猜我本垂綸者結茅東海隈一年苦行役不上釣魚臺順流絕奔

鱗安巢無天胎跼蹐塵土人焉能與之偕

自徐抵宿道中紀事有懷北平願庵公松軒公子

船上復車上徐州仍宿州不因河凍合那起客鄉愁曉
飯霜侵七宵眠月擁裘家人裁小帽鄰伴餉乾饅坂曲
驚疑簸川平穩勝舟紉寒牛背澁軸墊僕心憂古跡迎
人問詩題隔日搜計程常屈指惜別屢回頭豈有懽傾
蓋誰能怒挾輶因思安穩客文酒日風流

車上

老牛羸僕費驅馳
遠道黃塵日暮時
每為乘橋占去住
却因下阪識安危
五雲宮闕徐王隴
千載英靈閔子碑
欲斧澗冰磨剝墨
駐車重寫出關詩

徐王廟下作

好在徐王廟下鄰
人出酒飲行人自
說王家多寵庇
差科不動是閒身

鳳陽府

青天雨黃沙
白日赤若血
孤城臨長河
沉在苦寒節
去

城五里近仄徑又西折稅車槐屋下几榻稍羅列況乃
公子賢饋酒甚清冽僕人半已睡呼起沾口舌飢寒固
已慰羈旅亦可悅山鳥則在巢家雞則于桀我異鳥與
雞奔馳何時歇

徐子方穎軒記

余先世居杭之新城自先大父以下始寓於越在元盛

時聞吾鄉有方員

仲鈞治書經

徐鉉

子聲治詩經

馬章

玉相治詩經

三

先生者以詩書經教授于家得其指授者往往為名進

士而徐之二子伯與仲與亦有聲余生晚不及拜三先生又重以私門多故不獲一還故鄉交其門人為憾也一日仙居教諭徐君子方以書抵余自言與余同里閭為世婣且以所名穎軒者俾余為之記余雖未識君間詢君所深友則知君之尊府君德卿先生與三先生為契家而君嘗登三先生之門又從伯與君游最久譬之田焉治其菑畲而不蕪者也譬之禾焉濯漑芸耨而有秋者也又知君尚氣重義少壯時慨然有志於當世今

老矣方試其學為百里師而且以損名自勵噫君亦可
謂有志者矣余也孩幼多疾未壯而孤家學荒落五穀
不熟不若莠稗之有成尚能為君記斯軒邪雖然余生
田間頗嘗習夫農事矣其畊之也必深播而耨之也必
時賴而沃之也必勤既然矣日以烜之風以簸之雨露
以滋之而熟矣人之學也亦然講習以明之師友以成
之貧賤憂戚以困之富貴利澤以厚之而已矣然其所
以盡之者人也所以成之者天也余知盡夫在己者而

委諸命焉是故舍田而芸人者忘己者也握苗以助長者不知天者也忘己者蔽也不知天者惑也吾知君不蔽不惑者也將操耒耜而從君於學圃之中君庶以鄉故毋絕我

王克仁記

徐甲孫乙者饒州餘干人也餘干初為州甲與乙爭山乙偽異代券為己物知州事唐毅頗嗜地理學州有葉道士挾是術與毅善遂右於乙甲屈不肯平訴西提刑

司司下府君州往復數四卒直乙甲母兄王克仁故猾吏也恣其甥不能申且將肆毒而無由因激之曰爾老矣何生為甲訴愈力府檄傍邑安仁為覆驗州耆老吳谷良等數人詣邑言乞歸地置獄自旦至暮不決各散去惟谷良以善奕留邑長所甲呼谷良為助谷良不答甲歸亡聊至夜自刎於邑之柳王廟門外克仁告州誣乙殺之并道士谷良等皆坐繫拷掠不能勝乃皆誣服谷良二弟丙丁及其子辛日遇克仁於塗輒言父兄之

冤詈辱之無不至適克仁之二子往其女兄家修佛事
還渡沙港港水湍悍日晚多大風二子不能舟溺焉少
頃主濟者來視舟見篙擄墮水舟有遺橐且共僧食駭
曰此必王外郎家兒也持橐告之克仁輒笑喜曰吾計
得矣止家人勿出聲召漁者王大眼十數人出二子斧
其尸束縛之若加害者復投水中水濱有亡卒朱寄兒
匿林薄間須夜以渡悉得之克仁以吳氏口語故白州
曰吳氏殺我二子州追丙丁辛三人訊之莫得其尸巡

邏者顧見烏鳶啄水中舉而暴諸官三人之獄乃具府
司案下如法寄兒亦被獲諸都督府將出獄撫丙械言
曰殺二子有人非汝也丙泣問何人寄兒不肯言丙挽
衣不使去州幕長亦叩之寄兒言官但問王大眼言訖
而出大眼至自言我於二子無故人莫知其由克仁亦
爭之厲甚不能服丙復令谷良次子庚訴提刑司司下
其事如初州以疑讞慮其他訴并庚繫之谷良道士輩
已瘐死獄中矣辛季弟驢兒年十五請母自行竟訴闕

下上以付詔獄追寄兒湖廣且得其溺死狀并克仁賂大眼等銀穀事方二子溺時出外索租去港八十里止宿飲食物色可左驗詔克仁大眼等磔於市并誅克仁家屬先主獄官若吏及作作誅徒有差仍賜丙丁辛銀若干兩以釋之時洪武三四年事也青州左衛百戶州人葉莊椿為余道其事乃論著之曰徐甲之死過矣克仁實使之乃以誣其讐并其所與讐者二子之死不幸矣天實報之克仁又忍僂子之尸以賂夫人以誣其所

為口語者卒敗於亡卒小童是何哉易曰惡不積不足以滅身身死家滅子無遺類天理之不可泯也如此然而牽聯數十人或死於獄或死於術或死於變或死於賂或死於法盖有幸不幸焉噫克仁之不仁甚矣猾吏之禍極矣

贈段鎮撫詩序

鳳陽留守中衛鎮撫滕人段君世英以通敏武給之才為上官所器使者久矣今年春天兵下朔方我曹國李

公奏世英以從事上可其請蓋世英嘗逮事先岐陽武靖王以所以事王者事公而公亦以世英為舊人禮待加等凡甲兵金穀之數悉委之征戍調發之務悉資之而世英亦盡厥所事一乃心力不告勞勩既三軍凱還公方以事馳奏于朝命世英從行既奏上嘉其勤賜楮幣五定以遣之還經濠梁見蜀王於邸第復有賜如前數既侈上及王之賜得便道過鄉以省其親壽鄉之人榮之為其僚友者咸為歌詩以豔之時余在公幕府且

俾為之序余思與世英初出關崎嶇戎馬中風食雨臥未嘗少間據鞍覽古抵掌談笑未嘗不同善者掖之否者替之又未嘗不胥助也每南望白雲孤飛彼齊魯吳越觸目動心又必相與歎息或至泣下噫觀其事公之勤思親之切則其所以事先與事其親者可知矣觀其待余之誠之厚則其所以交夫凡百朋友者又可知矣乃今寵錫優渥榮家及親思以答所知者圖報乎朝廷思以榮乎鄉者圖顯乎父母若然則福祿之至庸有既

乎余也闕定省幾十數載旦夕將請予公以歸獲由山東拜聖人之宮展顏閔之墓仰瞻徘徊歷覽文獻因得登而翁之堂賡陟岵之歌諒未晚也請為滕人陳之洪武二十年秋九月既望會稽唐之淳序

將及鳳陽奉懷南澗公子二首

王孫送我最多情馬過新城復舊城鶯弄曉聲風正軟
草鋪春色雨初晴坐中別酒巡巡換卷裏新詩字字生
明日相逢更相愛為言軍旅在幽并

去時楊柳綠藏烟歸日梅花雪滿天北鎮山川行處別
東夷鼓角聽來便青年從事慚孫楚白首窮經慕伏虔
喜得重過南澗曲欲分淮水洗鞍韉

池河驛

前日中都雪都人慶豐年今日池河雪寒氷在前川平
明集僕夫飯熟猶晏眠高呼強之飯牛凍車不前黃犢
成素驪烏巾為白氊却憶荆山外別有瓊瑤田去京尚
十舍去鄉仍渺綿安能訟滕六旭日布九天

清流關

過阪當牽驢過關當下車下車當用扶牽驢當用驅同
雲蔽曾岡積雪平丘墟行客歌苦寒羸童嘆無襦稍見
遲日升輕冰猶在鬚仰懷多病母長年卧茅廬靜言思
奮飛迫切危險塗危險不足恤救水當何如

道中懷故鄉諸友

暗中櫛髮月中食驢足凌兢度晚山殘雪滿川遺萬玉
好峯留霧失雙鬟此身老去星霜改遠道歸來歲月閒

想得故鄉諸舊友青綾高卧掩松關

滁州逢王雲莊談蔡蘿屋

舊事吁可怪客鄉聞亦驚風波開貝錦雲路失鵬程莫
惜干城器難忘伐木情臨岐無復得知作貴州賓

到京得毛鼎仁金齒書

十二月
初一日

萬里書來已二年驚聞不死却悽然家人縱有惟存半
別夢雖多不記全目斷蠻雲心似雨淚兼蒲墨字如烟
可憐謝野原頭路誰向春風掃墓田

自京還越道中雜占六絕句

初八日出通濟門以下皆車船上所作

脫却雙輪換獨輪
乘船人作坐車人
明朝又復乘船去
却畏風波不畏塵

曉日蒼涼帶水烟
畏途行盡半平川
臨流自顧戎衣笑
車馬驢船過一年

毘陵郭外早行車
小店鷄聲古廟鴟
棟樹東邊門巷曲
隔牆新見臘梅華

數峯高擁見岩堯
一鶴長鳴破寂寥
欲過虎丘尋劒石

望亭亭上望楓橋

黃昏月出大湖東
霜葉無多也自紅
一色金波三萬頃
垂虹亭子正當中

齊雲樓上大飛沙
楚國祠前箭似麻
事業總隨流水去
空餘人唱石榴花

常中過鄉中二僧官

去京三四日乍喜見扁舟
塞夢猶驚馬詩懷却借鷗耳
邊吳語熟雲外楚山稠
更得逢禪侶羊車肯暫留

南澗書屋詩序

南澗者我隴西李恭獻王之墓之原也書屋者王之孫
君讀書之所之名也堂以書名而書堂以南澗名示不
忘其先且有志於學也恭獻王為帝近戚恭獻之子武
靖王以帝甥為開國元勛二王德業具載國史君之兄
既以襲封于曹君以貴介公子遭時平康若可以優游
家邦無事乎詩書者矣然方被旨居中都之賜第距南
澗不遠恒閉戶却掃日誦數千言時時登臺躑躅攀樹

哀慕擷其藻芹薦其時食其暇則過諸先生長老辨疑
析難俾益其所不足又其暇則吐為歌詩清婉麗逸與
山僧野夫較尺寸輕重不厭非篤志于學圖紹厥先者
能然乎今年冬眉山蘇伯衡先生嘗登斯堂而為君記
之矣他日復命其客會稽唐之淳序諸作者之詩辭蓋
將輯而為篇什焉之淳庸陋何足以序之雖然竊嘗聞
之人莫不飲食也鮮能知味也若君之於學食而知嗜之
嗜而知樂之豈徒餽其糟粕以自昏竊其浮滓以自肥者

哉必也薰陶乎醇醲屬厭乎旨甘不自知德之潤乎身
而晬面盎背之可喻也故凡天地陰陽造化之理人物
鳥獸草木之故古今興衰治亂之原與夫三綱九法之
所以扶植淪斲者皆於書可究也君讀而究之究而知
之書何負於人哉藉出而用諸朝廷措諸事業不忤不
愧俾人曰惟恭獻有孫惟武靖王有子惟公有弟人何
負於書哉唐有良將相曰鄴侯泌西平王晟然鄴家多
書而其子繁不善讀西平身有大功而其子愬克踵其

武昌黎韓子咸為詩以頌之然其中寓美刺焉後之人
詠其詩懷其人未嘗不為之感激歎息也今君之姓氏
與之同其先勲業與之同其家藏書又與之同則所以
思為其子孫者宜同乎嚮以自期勿同乎繁以自勵也
嗚呼四海之廣都會之大繼自今而咏南澗之詩者豈
無韓子其人哉敢請序而俟之是年丁卯十二月既望
之淳序

題葉貢士湖曲草堂

十二月十七日抵
家以下皆家中作

客來不騎馬反作艇子嬉醉來不著巾倒著白接羅門
前一頃菱箇箇如紅玉收取當秋租食菱勝食肉湖稻
大顆粒湖魚三尺強稻可飯朝夕魚可煮羹湯東頭賀
監居西頭放翁宅看渠作官歸與渠作相識

題汪季子煮雪軒

煮雪當山泉松壚裊竹烟玉花光欲動蟹眼味初全法
自陶家得經從陸羽傳幾回寒夜渴謀借剡溪船

送貢士會試

別酒頻頻把離絃
款款聽舊霜楓葉赤
新雨柳條青月
斧看修桂牛刀試發
硎故山空蕙帳誰照
讀書螢

題畫稻

稻田到秋熟歲歲常食粥
食粥可療飢種田當及時

題畫菜

開畦分種味插竹當垣墉
安得身無病長為賣菜翁

弔錢塘盧清源墓

三尺新碑處士墳
鄉人猶解說清源
東阡西塚多金玉

不及盧家好子孫

杏田農贊

為醫者作

有儒而醫杏田之農不稼穡而三百其廩不耒耜而其
崇如壙湯液以沃其內針砭以耘其外明五運而無水
旱之苗却三尸而絕螟螣之療杏之殖矣猗儺其實人
飽我德我食其力斯人也固非舍已而耘人亦非握苗而
助長蓋將祀董奉為先田歌靈蘭而擊壤輔大德之生
生而無愧於俯仰者也

賦崔彥暉雪林小隱

暮歷更氤氲林居靜不喧
晝光琴薦濕玉氣石牀溫
夜雨泉驚枕春雷筍到門
看知書畫法幽趣許誰論

題趙彥徵晴雙騎圖

得鞚金羈不動塵
新蒲細柳曲江春
瀛洲學士參差是
十八人中見兩人

留別錢塘友人戴錢二公

正月
望日

每向天涯共憶君
及歸來日又離羣
故人暫得從頭數

好句須留會面聞西子湖邊燈照月李陵臺下雪如雲
一身萬里尋常事塞北江南幾夕曛

戊辰藁

過江浦縣與高昂霄聯句

西收風正一帆開江浦城高曉角催初日晴分駱駝嶺
五雲光湧鳳凰臺驛亭旗影藏新柳野店醅香帶落梅
北望醉翁亭子到欲尋遺刻步蒼苔

滁山道中雜題

谿暝深藏柳坡晴濕護苔只鷺聯騎去不見一人來
麥隴叢叢綠梅香樹樹香山禽驚客夢村酒割人腸
虎過山風急山家早閉門遙憐未投宿月黑正銷魂
浮圖連石磴略約枕溪灣驢背東風裏遙瞻管店山
人到說旌麾前朝過下邳自慚行旅滯非是戀吟詩
春樹留殘葉晴峯帶宿嵐淞陽山水秀人道似江南
林密草纖纖卑枝拂帽簷春光來一月猶畏曉霜嚴
公館借吟詩行厨送午炊數株臨水柳曾得繫金羈

狹路轉多歧多歧可問誰試詢曾到客猶似未來時
獨樹廟門前鴉巢挂紙錢欲尋遺像問塵沒已多年
下阪復登岡前看道路長不知行幾日能得到淮陽
宿草發新荑沙乾葉未齊待教寒食雨綠映錦障泥

自濠抵邳雜詩

暖日輕風古道傍平原宿草正茫茫過橋驛聽津亭鼓
隔水船窺估客檣圯下無人邀孺子小山有賦憶淮王
細思楚漢爭雄日此地今餘幾戰場

河北三春雨天南五夜雷山川新氣色車馬息氛埃燕
逐遊蜂至鶯催候鴈回不逢沽酒館何以得銜杯

山石堵橋險似梯下窺流水淨無泥水邊多少垂楊樹
著個黃鸝來上啼

紅白花開宿莽間長亭小店接村灣行人未識邳州路
馬首先看虹見山

銅雀瓦硯歌

漢日欲沒衆星紫老瞞干天擾天紀身辭篡弑遺厥嗣

却付分香蕪賣履銅爵高臺五雲裏聲色娛人死無已
西陵墓草青如洗舞塵細逐歌聲起臺傾土荒產荆杞
遺瓦深川良有以豫章得之諛墓鬼琢配翰墨象焦尾
仍銘其陽志其喜硯工文奇稱二美隴西王孫武靖子
寶之不翅瓊瑤比芳春燕客陳悲几冷電晴雲照秋水
研辭釋文拂塵滓紅絲無光馬蹄毀鄴城狐嘯豫章死
一甕千年置郵耳欲鐫短歌愧無似乞借揮毫刪魏史

題趙文敏公書韋蘇州詩後

余聞前輩論二王書古人文章皆因人與文而異其體如樂毅論之方整莊重東方朔畫像贊之跌宕不羈曹娥碑洛神賦之憂苦飄逸要當心領神會今觀趙文敏公所寫唐韋蘇州三詩亦然謹為之評曰水流花開鳶飛魚躍秀野行雲晴空舞鶴南澗公其寶之洪武二十一年歲次戊辰二月上丁日會稽唐之淳書于鳳陽行第之梧月軒

賦高氏苔竹軒

蒼苔綠竹誰所憐高君作軒苔竹邊
三春雨濕錦紋亂
六月風寒丹鳳眠有時自引階前鶴
踏破雲根竹華落
有時自煮石鑪茶輕烟冥冥縈屋角
我來正值清明時
蝸篆生香入硯池青蔥色裏無人掃
剝啄聲中有客慕
我知此君愛幽獨亦欲依君結茅屋
乞借牆陰半畝苔
更植堦西數竿竹

登邳城樓

二月六日到邳
以下皆邳州作

挂劍臺前事已非
絆戈山下草離離
城門日沒烏栖早

野渡風高客過遲
十萬牛羊新部落
五千貔虎舊旌麾
泗河東接沂河去
曾與行舟記下邳

邳州八景

峿峯霽雪

玉龍行處夜無聲
北面峯巒失翠屏
天上白榆寧有種
人間瑤草不知名
青燒獵火朝烟濕
紅露仙樓夕照橫
記得塞天曾見慣
薰風時節到遼城

僊掌晴霞

何處丹霞似赤城，仙人掌上最分明。
若非玉女裁衣罷，定是天孫織錦成。
孤鶩齊飛天欲雨，斷橋斜映夜還晴。
會須絕頂營茅屋，采作朝食嚙日精。

圮橋夜月

泗水西邊沂水東，留侯黃石有遺蹤。
一編不受秦人火，三寸終成漢室功。
曙色蒼涼茅店月，履聲寂寞柳營風。
我來圮下留多日，幾度興懷聽漏終。

磬石秋風

水濱浮石勢參差風急秋清出韻遲總是虞廷春貢後
不同蕭寺夜禪時響連月壑蛟龍懼靜谷霜林虎豹知
何處鐘聲起迢遞分明律呂遠相隨

鹿湖烟雨

雨稀烟暝水增波鷗泛春聲入棹歌揚柳人家茅屋小
鰕魚時節釣船多暗歸浦淑鏘環珮密掩峯巒濕髻螺
定有仙人騎白鹿夜闌來此奏雲和

沂水春瀾

雪融冰泮發漪瀾望入河流杳靄間
杜若未生黃鳥起夕陽猶在白鷗間
聲翻煖浪沉芳樹色漾晴嵐滅遠山
春服已成來襖袂傍花隨柳欲忘還

魚亭晚釣

亭前不改舊山河落日垂綸感慨多
客至已非金谷會風來猶起晉時波
珊瑚摧折遺蒲柳錦帳荒涼長薜蘿
更莫臨流奏長笛渚花汀鳥奈愁何

劍臺野望

荒郊不見徐君墓此地空閒挂劍臺三尺英靈如有在
九原魂夢亦堪哀林烟拂水青萍合山雨飛空紫電來
望極吳中憶遺廟春風幾度野棠開

射狼曲

甲士重重旗簇簇一色晴原春草綠將軍小隊出嶧陽
健如飛鷹不可當馬人傳令弓人受駢弓在前箭在後
士雄馬肥弓力強膽落北山雙白狼呂梁洪邊鼓聲起
毛血攔斑狼墮水

題張從禮掩骼埋胔卷

洛陽張從禮之寓於邳也始至視其郊關荆榛翳如視
其原野白骨紛如則戚曰人實我敵人死人恤暴骨之
謂何我不彼瘞我則非人帥役者具畚挿掇拾任載無
遺焉擇燥剛之土若州之西北鄂若南門之東若木社
若沙坊之陰為冢五邳人歌曰孰掩者骼張公之德孰
埋者胔張公之義張公其痛瘞骨五區實豐其區而虛
其家既成時其春秋而設其奠又歌曰列塚惟五死骨

起舞籩豆孔嘉鬼飽而歌瘞於斯享于斯來者其冢之
後十有八年越人唐之淳過而聞之遂書以附于州之
志

喜國公大人奉詔北征

使節方臨外兵符忽自中素心承一德綸語冠羣公馬
熟菰河草旗生瀚海風曉占幽薊色雲物霽崆峒

張從禮傳

張從禮雒陽人其先仕元有至行省左丞路總管者以

是久留于燕至正末歲大歉從禮多賑卹之義聲隱隱
諸公間中執法陳魯公思謙郡人也臨薨托其幼子麓
於其友中書叅政李公孟幽公為求昏于從禮從禮因
以女歸之而拊其家甚至洪武初年自燕徙濠未幾聽
自便居邳時兵戈甫定邳故軍壘骨齒旁午四郊無居
人從禮率童奴環百里內輒得輒收瘞多者千數少不
下數百凡為大冢五冢墓既成歲時徧祀之迄今弗替
歲癸亥春不雨吏民患之禱于城隍神則不應于羣望

則又不應有以滄浪淵神祠告者從禮則徒跣往禱決
旬乃還復躬乞水于嶧陽山故漢令韓稭祠則又不雨
衆志方懈從禮誓于衆必得雨乃已已而雨如注吏民
德之間竊自念曰人孰無祖亦孰無死吾去墳墓餘四
十年年幾八十祖兆蕪矣死期至矣恐身先朝露何顏
見先人於地下乎且麓已死惟有一息魯公之緒不絕
如縷吾二氏丘隴相望乃攜其外孫以行至則負土封
樹之時天大旱卽山草木無生色土墳龜拆版築不興

從禮慟哭籲天天為澍雨僅足襄事五里之外無霑焉
鄉人數異為泣曰是還也不惟張氏之為飽鬼陳氏之
鬼亦不饑矣他如歛浮河之尸歲凶為粥以食餓者死
不能歛歛不能藏者為之治其槨若墳遇遺楮幣於道
必詢其人以歸之其於周窮念故汲汲若嗜欲不倦不
顧家之有無蓋其天性然也從禮名異四方之人識不
識咸稱為張義士高其行而紀述歌咏之若干人洪武
十八年有司以掩瘞事聞嘗書其姓名于旌善亭云會

稽唐之淳曰余讀五代史獨行傳歎夫世衰道微苟一行之可書者必為之表見于世甚盛心也矧今從禮之可書者衆也孝以事親誠以格神仁及乎朽骨義周乎人人顧今耄矣無一丈夫子天之報施者何如也然其聰明康彊視聽不衰壽考之福盖未艾耳余北游過邳嘗登所謂義冢北臨嶧陽西望季子臺弔羽布用兵處沂泗流其下洶湧有聲朔風蕭騷落日照野草而歸然之冢與彼數者參差乎其間從禮其無聞也邪其可傳

也邪悲夫

奉和憶邳城寓館之韻

三月二十五日發邳
以下係舟中所作

陸賈曾存越班超解拓邊公方持羽檄吾豈戀舟船蒲
葉迎旋旆桐花落舞筵明朝羶帳月光照拖機眠

舟中有作奉呈公相

喜得天風送去舟還從楚尾識吳頭浪花白處魚吹雨
梅子黃時麥弄秋一派棹歌連感篋兩行旌旆雜兜鍪
路人解說朝天馬昨日清明過泗州

和荅南澗公晚別後見寄之韻二首

三月二十八日到鳳陽以

下係舊城作

晚天相送不相隨正是初三月上時想得到城門半掩

一簾燈火數聯詩

寄來詩句慰情親首首清和字字真不合王維合王建
前身多是盛唐人

四月六日宿方東軒觀方集有作

星離歎睽乖簪盞欣會晤幸茲燈燭光獲覩鏗錫句雄

若河注海纖若繭抽緒靜若禪士定專若獰婦妬朱紘
閔郊壇畫戟森武庫高將蹤漢蘇近或企唐杜羈悵滌
故煩雋腹飽新飫座有吳子賢雅多延陵譽衆樂方具
列善聽別音度愧余窘行役聚鮮別乃遽坐席未及溫
秣馬已在馭詩殊伐木吟曲擬驪駒賦時夏宵苦長天
涼雨如絮城更猶隱樓庭鷄忽號樹悵矣明發辭餘音
寄遐慕

發鳳陽途中呈徐公子

四月八日以下
係道中作

聯騎發濠州
梅天雨似秋
馬多同棧樂
人少異鄉愁
小嶂藏輕霧
深渦走濁流
榆花零落盡
春去若為留

唐愚士詩卷三

欽定四庫全書

唐愚士詩卷四

明 唐之淳 撰

奉和公相池河驛中留示之韻

君親俱在念風雨肯遲留不作隨陽鴈真如泛水鷗寸
心馳萬里一日似三秋料得承恩處南薰五鳳樓

過清流關追和宋滁守林公石刻詩韻

亂後關山開王氣雨餘行李帶春泥鶉鳩啄榘蠶開簇

布穀催耕水沒犁壁上好詩無客和井邊遺廟有烏啼
翻思野渡舟橫處只在滁州西澗西

附林詩

病起溪翁枯侶木語多村叟醉如泥麥邊雨剝水鳴
隴月裏農忙雲破犂山柳帶愁知客意野禽解事向
人啼明年此日華時節我也東歸君也西

贈袁公子

四月十二日還京
以下並新居作

往年同事李輕車幕府青年總不如談陣愛知司馬法

臨文能讀魯連書
弓刀北塞秋風勁
燈火西堂夜月虛
今日相逢畏相別
天池早晚化鯢魚

東軒記

夫士有堅忍之操
方未達時
攻苦食淡
人不堪其憂
何則
素所養者然也
至富貴之人
舞歌聲色
熟於耳目
與馬服食便於口
體諸所欲為
無求而不可得
脫能遺世利
擺斥舊習
蓋千百而什一耳
此吾於曹國李公東軒見之
公富貴人也
非賤士也
三世兩王身
襲重爵
凡人

之所謂富貴者公一切屏斥不務凡士之所務者則惟
日不足焉方闢一室於中雷之東偏揭張子東西銘朱
子敬齋箴於坐隅朝夕覽觀以為修進之助其志之所
在有韋布之士不可及者之淳忝門下士知公為深觀
公之退食自公書思對命儼乎若至尊之在上而陟降
乎左右也齋明孝思致敬思慤凜乎若祖考之尚存而
愾乎若聞乎其聲氣也應接事類酬酢事變薰乎其春
溫而煦乎其有度也竊嘗因而論之周孔子之歿久矣

真偽善治之泯乎其無文也亦久矣或有其具而無其
位者有之獨漢諸葛孔明負王佐之才都將相之位其
在草廬也抱膝長嘯慨然有志於當時及其貴也廩無
餘粟庫無餘財猶與其子言學須靜也才須學也是則
草廬之困不能易廟堂之崇三分之權不能變靜學之
守真所謂豪傑之士也至宋魏國公大丞相之子張公
敬夫學孔明之所學志孔明之所志日居南軒究夫天
人性命之旨嘗著武侯傳以見志位不稱德識者恨之

今公家有魏國之勲身慕南軒之學譬之太山之雲足以雨諸天下將見夫觸石而起耳然則南軒之所不竟者於公蓋將無憾焉且東之義於時為春於心為仁惟不殺以為威故煦乎其若春惟惻隱以為心故肫肫其如仁此又名軒之微意也詩曰維其有之是以似之又曰靡不有初鮮克有終敢因記而并及之不然則公又何以春風和氣名燕居之堂乎洪武二十一年歲在戊辰夏四月既望會稽唐之淳謹記

五月朔日雨中有懷靈谷禪師

淅淅西塘雨
曠曠北山雲
雲從望邊起
雨向睡中聞
但雨迷故轍
歸禽失前羣
異鄉多知友
繾綣獨論文

和徐公子懷公相兩歲不得同賞端午韻

漲天風雨攪離情
忽得新篇破宿醒
眼底字疑山月照
耳根聲似石泉清
每經佳節身多客
却憶征途夢亦驚
艾葉榴花濠上酒
元戎此日共誰傾

送敷竺曇住義烏雙林寺二十韻

寺有雲黃山并塔又有雙神堂

傳大士

道場也

雙林古名利嫠女之烏傷雲出漢水白雲歸山氣黃維
昔傳大士依山開道場六時動天樂草木生妙香峯頭
七佛塔塔下雙神堂堂中席久虛猿鶴愁怨望吾師霞
外秀六十須眉蒼祝髮石橋左挂衣雙澗傍小笠冒暑
雨輕袍帶晨霜手持文部檄脚踏龍河航訪我玄津西
送之鍾山陽是時五月朔綠樹薰風涼蒼蘼白勝雲萑
蒲過人長我留看歸去遲迴以彷徨師行過越鄉煩師

一徜徉鄉中多親友念我幾迴腸為我少安慰令我羈
思忘馬羣有騏驎羽族有鳳凰覽德匪稱力如火不用
光大士遲師久勉哉宜自彊

和徐公子同遊

地拱皇都接太微寺連岡阜勢裁巍殿門幡動朝行道
塔院燈明夜啓扉中使傳宣香滿袖胡僧露坐罽為衣
偶因晴日陪遊賞喜得祥雲傍馬飛

訪友不遇

觸熱訪君池上宅
草屋竹籬新板扉
黃塵撲面日卓午
知在翰林歸未歸

雨中遣興二首

舉觴問酒亦何如
四月初連五月初
出水大魚看處好
望晴乾鵲報來虛
睡多夢熟還鄉路
濕久蝸沿棹架書
安得此身輕似鶴
雲頭松頂寄巢居

已晴還雨半陰天
石榻紗厨不得眠
新水白翻風裏浪
好山青染夜來烟
心同渴驥奔鯨海
身學浮萍拂釣船

故國老親思望切數行音信若為傳

送白先生還越

三年兩度賜金歸南極文星隱少微聖主恩深才不忝
上公情重禮無違問船回馬丹陽郭臨水登山白苧衣
自念同征不同去煩君為我訪庭闈

賦徐公子澄碧軒十二韻

賜第古城東池連舊辟雍畫簷涵浩渺素壁動沖融公
子開軒處長雲野望通影沉南寺塔聲浸北山鐘曲檻

臨流得橫橋到岸逢龜翻荷蓋雨鶯擲柳絲風莎借秋
簾綠萍欺曉慢紅蝸傳書法古魚識陣圖雄舞劍驚飛
鶴談詩起蟄龍自天恩澤溥向煖墨華濃氣氾研朱露
光浮射鴨弓我思分釣石莫遣碧苔封

暑坐喜雨

凍雨塵外飛涼颼霎然至遠岫分夕陰輕雷閣炎氣雲
端去翼滅石罅奔流駛境勝神亦融無言轉多思

讀和古體凡二十有六韻豐腴醇重有順無彊第

其間與予過實君子寧失於厚公則有之受而
不慚正恐不免見譏於識者別用奉答以謝愚
拙時戊辰六月癸亥朔日也

王郎長詩壁壘堅老將睥睨不敢前方公偏師扼其吭
如竇車騎登燕然我聞一鼓避三舍鏃不破的敢言射
閉關朗咏二公篇纍纍星斗鍾山夜

賦得乾坤一草亭

天地之間寄此身九州隨處結比隣鄧林東影扶桑國

弱水西沉析木津坐上竹書開宇宙壁間藜火落星辰
不愁風捲三重破惆悵誰為百歲人

六月十日夜宿江上韓橋店

是日舟發玄津
橋以下舟中作

晨臚畏炎曦夕枕愛輕爽星搖大江動月送鷺潮響微
鐘答野吹短夢興遐想雨止流螢來熒熒度疎幌

登觀音山洞

十一日

懸厓臨江臯飛閣棧石面空中金像古寫下雲濤濺淮
楚指顧間河漢中流見幸與風水遭寧辭登涉倦

渡江至儀真

十四

山月未落潮水平不聞潮聲聞榜聲乍徐忽遠復興舉
宛若秋天鶴鵲鳴龍潭已過儀真近江南行更江北聽
瓜步屯邊戍卒閒白沙壩下鹽船並桑麻旆旆黍油油
楚色江光萬戶秋七十里程弦樣直好風今夜宿揚州

揚州

十五

蕪城草色綠迢迢勝國繁華寄寂寥紅藥無人開錦幄
玉樓何處教鸞簫荒祠古木雷塘路細雨平莎揚子橋

五日惡風今日好攤書高卧仰青霄

揚子橋

白浪迎船走玉龍船頭人聽廣陵鐘
朱簾寂寞瓊花落
二十四橋空碧峯

邵伯鎮龍王廟

夜合花香槐子肥廟門人集祭龍妃
靈風洒面雲旗濕
知是朝來行雨歸

高郵湖

十五日夜

高郵湖湖中飛蚊不可驅六月七月日未沒春雷隱隱
鳴菰蒲飢蚊如鍼峯飽蚊如櫻珠遶船大叫掌流血有
夢不得游華胥前人寄語後人道不信但看露筋廟

南湖

廟在

淮安月夜

處處南風藕自香人烟多處是山陽兩城對壘車輪小
一水中流衣帶長哀怨昔曾歌布粟盛衰元不問金湯
今宵偶作淮東夢無奈月明思故鄉

夜過泗州

十七日

明月長淮水孤帆永夜船
缺雲呈遠漢涼露落高天
州近更聲急山微塔影偏
江湖多興緒吾亦信吾緣

寓淮北行府呈公相

十九日抵鳳陽
以下皆鳳陽作

府第雄深出聖裁
濠城北面接魚臺
恩波正比淮流遠
瑞靄多從禁國來
周室藩邦基百世
漢家戚里近三台
金魚玉帶親調餼
日對南山舉壽杯

奉和公相韻

小雨濕斜暉殘紅閣翠微寺遙僧過少河漲客來稀
習靜留雲住乘閒放鶴飛幾農侵月散知罷桔槔歸

壽公相

初三日

南極明黃閣長庚映紫垣地居勲戚右身處相臣尊
金狄符仙籙丹心照寵恩階棠三葉秀和氣靄東軒

淮上七夕遇雨

雨雨風風淮上城水禽山葉送秋聲可憐今夜星橋月
不著清光照客情

往荆山道中即事

七月九日登舟

小河水深沒馬頰浴盤浮渡如浮杯碾渦咫尺不可上
四夫爭挽聲喧阗大河雨餘勢業業邑人來迎具舟楫
片帆天際落春雲萬斛空中舞秋葉東邊雨響西邊日
船上鼓鳴船裏笛餘霞閃映一川明大魚驚跳雙尾赤
帆迴棹進指淝河塗山荆山顰翠蛾當年輯玉會朝處
今日西風生短莎山前屯兵半降虜山後人家盡禾黍
倚灘晚飯已黃昏將軍橫槊方懷古

游塗山記

洪武二十一年六月既望會稽唐之淳從曹國李公治
兵于鳳陽七日辛巳以上命賜楮幣于懷遠屯甲申度
于淝涉于渦入于邑逾于淮歷荆山弔卞和抱璞處登
塗山騎行五六里始險仄乃舍騎而步至山巔謁有夏
皇祖祠祠有白杏一本高可五十尺婆婆娑狀車蓋正東
一榦旁出不葉而下垂如乳然相傳每霧雨乳輒津津
以血受之可共道人食乳下有池方數尺金石而無土

邑人以六月六日修祀事至者無衆寡隨汲隨溫今涸
云祠下南行半里許觀啓母石石具人體昂首蟠腹而
蹲踞其言不經見疑石工所為也地多山查子正紅如
丹砂可取以食又有石蓮產岩厓上大如杯絕類芙蓉
華白色無葉好事者采去懸著戶牖間能久而不萎又
行二里乃騎而下至山趾入黃熊廟廟祀禹父鯀黃熊
即左氏所稱者也廡下有祖無擇所為碑文斷缺不可
讀今為老子宮一黃冠主之黃冠奉瓜茗以供公與客

步楸梧之陰念疏鑿之功德與日月常在慨夫九河十
城八堰九澗者或興或廢或在或亡或已湮沒而無聞
矣遂賦以紀茲游抵暮宿淝上野人劉氏家明日浮淮
而還之淳復書其始末以為記

陪南澗宿

七月十
七日夜

銀燭爛春霞高樓隱暮笳月光侵坐薄雨氣入簾斜醉
眼翻嫌酒詩腸却愛茶語多渾不睡秋思逼窗紗

是夜蒙公相寄示三首因用韻以成

雲頭鶴背碧迢迢
仙子飄然不受招
直入銀河秋水去
好風明月是輕橈

日長公府坐論思
羽扇風清虎帳垂
望見石枰斜點筆
不知詩句欲懷誰

淮北淮南兩地情
藕花菱子月三更
心同老鶴無多睡
聽得東軒剪燭聲

和南澗經然燈寺韻

長塗策征駢解后
棲禪處入門坐
盤石果得山僧遇
陰

泉浥雨漪陽坡蔭雲樹衣留犬顛室馬繫支公墅一息
神已怡忘言轉多趣所嗟塵鞅羈又復揚颺去

和公相曉出中都父道門韻

二十一日發鳳陽以下舟中作

太微連甲第黃道接天居月拆收更罷星軺發輒初鞭
聲喧野渡旗影照村墟欲出懷調饒言歸畏簡書寵光
朝奏畢物色苦吟餘自笑從公後烟波負老漁

和公相舟行即事韻

水面吳歌接楚歌歌聲不似水聲多却帆搖擣過湖去

一路秋香生晚荷

擬唐人遊仙二首

度海乘龍底用船上清知號不知年西分弱水澆丹竈
東入扶桑繫馬鞭文字每書龍漢後封章多到玉皇前
幾迴下視人間世碧落空歌動八埏

家住蓬萊第幾峯靜如雲水動如龍九天官府無人到
八海山川有路逢岩畔牧羊曾化石坐中吹飯或成蜂
夜來青鳥雙飛去寄得麻姑信一封

揚州竹枝詞四首

隋家楊柳古揚州
楊葉無多野水流
莫說小紅樓畔路
瓊花觀裏少人游

小年曾入鎮南家
回首西風白日斜
獨抱胡琴理胡曲
白菱飛上野菱花

十里珠簾賣酒旗
一時都逐火雲飛
傷心欲問前朝事
白髮淮人即漸稀

往年歌管不曾聞
遮莫商船到北灣
今日樵兒吹野曲

猶傳一曲漢東山

送一齋公子還鳳陽四首

七月二十七日到京以下皆京師作

同泛樓船上玉京獨騎歸馬向濠城日斜烟淡山如寫
江北江南一段情

綠浪輕帆潮熱後白雲歸路鴈啼時望來鞭影旗亭暮
吟過滁州幾首詩

疋馬新從闕下辭揚鞭疾去莫教遲尋常一樣中秋月
誰似升堂捧壽卮

明朝送客出城隅先向東家借蹇驢
僕健馬肥泥水少料知三日到中都

和昂霄見懷韻

偶作淮南遊空煩故人待執熱思雨涼
馳情寄雲海豈無黃髮期但恐朱顏改
共保金石軀芳名歲寒在

讀千里題賞靜詩因而有寄

舊聞詩學有淵源喜見新題賞靜軒
拾得珠璣愁海客織成雲錦費天孫
竹烟茶熟風生枕鶴夢秋清月到門

我亦鍾山愛嗟者好煩尺牘寄瑤琨

千里有詩見貽次韻以答

自入秋來相見頻手揮談麈愛清新三冬文史青燈夜
七尺丰姿玉樹春馬上射生聞膽畧坐間寫詔得精神
爾家慈母王家女宅相于今見此人

題徽宗寫秋塘翡翠圖

藕花紅墮蓮房老藕根水澁波聲悄一雙翡翠破蒼烟
銜魚出波飛向天日暮無人來盪槳半黃殘柳寒蟬響

書趙吳興書畫後

吳興公畫馬神氣雄俊書韓昌黎雜說於其左筆意飛動真奇品也或疑公之意寓畫者恒有而識畫者不恒有有如千里馬不遇伯樂世之駢死者何限使有善畫雖斷纖寸楮閱百世猶一日尚何患無賞識者哉余恐公意未必然也洪武二十一年歲在戊辰八月既望會稽唐之淳謹識

懋公輔文集序

余讀經史之暇嗜觀漢以來諸家文辭怪其博而寡要至得西山真氏文章正宗則豁然似得其要領何則其所類者大畧有四一曰辭命二曰議論三曰叙事四曰詩賦四者之間非持論純正有關於政治者弗取蓋辭命者有國之先務而代言者之所職也故以是先之而次之以議論之為重乎苟叙事而已矣詩賦而已矣非吾真氏之所與者也余恒取以自式而且以求諸當世流輩之論文者間得其一人曰懋公輔氏者為臨海人

余亦居浙河東雖不遠千里然未嘗有一日之雅竊於
文字間窺其為人思欲與之交際而接其語言意其皆
鑿鑿乎中道理者也去年來始獲識公輔信乎不特其
文辭而目其儀容而耳其笑談而味其旨趣而純乎論
議之公而有關於政治者也第以其職居下僚未克
立乎代言之地其見於著述者論叙詩賦而已耳觀其
大篇小章根據理義開闔往復各出機軸不勦說以為
同不矯情以為異如興仁義之師以弭猾橫之寇如持簡

易之方以伐疴瘵之疾我之所以致陳施藥者固未嘗赫赫以為威切切以為功而彼之所以銷蝕化毒者自有所不暇非長於論議者能之乎余方樂與之游願學之而未能一日友人顧君文昭謂余曰子既好其文盍序以貽之余謝以不敏雖然公輔余之所畏也其於文辭無所不能也無所不長也而予特以論議發之者譬之劑以名韶韶非劑而止也鹵以薄衆衆非鹵而止也舉二器而禮樂之名立正宗之於文豈誠有見於此乎

公輔碩茂與朗方翹然有聲朝野間行登兩制無疑也
他日大全有集必有若西山先生者為之彙而列之文
昭試以余言諗諸其以為何如

題十六羅漢畫卷

十六應真誰為寫無住菴主隆茂宗茂宗親入龍眠室
意匠彷彿將無同結跏趺坐侍天女偏袒右肩降神龍
手叉布衲雲石靜背倚蒲團秋樹空或圓其顱獐若怒
或帽其首皤而翁或持經卷面新竹或燃長鬚修古容

或陪語笑蔭嘉木或袖麈尾鄰枯筇或憩犂确枕蒼虎
草木衣袂皆天風或老無力挾以幼牙齒脫落雙鬢童
一翁羽扇治茗飲二士徐行相與從就中筆法各臻極
體態一一清而丰非仙非神亦非鬼特以戲幻施神通
我去天台不千里赤城烟霞魂夢中胡麻飯熟木瓜爛
桃花流水春溶溶每思石橋若天上有脚未踏心忡忡
今日何日展圖畫鍾山秋雨鳴梧桐欣然矯首望瀛海
應真有靈當我逢

竹坡辭為湯公子賦

繫坡陀兮岩谷蔭蒙龍兮脩竹月湛湛兮照夜烟冥冥
兮升旭坡之人兮相羊依密蔭兮開洞房剪春籜以為
冠兮製秋雲以為裳截高枝以為竿兮釣溪流之鯉
魴竅玲瓏以為管兮集高臺之鳳凰鳳凰兮來下食有
魚兮飲有醕挺持節兮養幽素坡之人兮受天祐

期高公子不至分韻得佳字

坐起對涼雨綠苔生碧階如何跬步間竟作萬里乖遠

鴈送秋色白雲滿秦淮所思如鍾山日夕空自佳何能
一飛墮翔泳展中懷

和答趙孟玘二首

同抱琴書客異鄉巷南巷北見尋常論交有道傷時俗
沽酒無錢愧客囊騏驎夜寒沙塞雨蟋蟀秋老石林霜
何時重理漁蓑去短楫長竿鏡水傍

睡起多從池上行不宜風雨只宜晴看知鳥鵲營巢意
聽得魴魚散子聲夕徑響添鷺木落秋袍涼透覺雲生

客邊喜遇談詩友時復相過慰旅情

中秋有懷

去年夜醉漁陽月身逐邊鴻寄天末幕中文采六七翁
歌舞喧呼至明發今年獨客鍾山陽有家不歸仍異鄉
午時雨落晚未息桂樹無影星收芒寒砧楚曲秋聲早
南北東西故人少明年又復在何鄉且吸清尊慰懷抱
雨窓睡起賦得浪字

倦來隨意卧匡牀歸路無多客路長簾幕已空秋社燕

房櫳猶貯午時香
錦箔生戶蛛絲合
銀燭當簷雨氣涼
記得暫時逢酒伴
瓦甌蓬底醉滄浪

奉懷國公大公無寄楊鎮撫

一從馳驛向西秦
幾欲封書托使臣
渭水白雲生馬足
函關紫氣接車塵
衆中持節傳宣久
到處題詩訪古頻
藩府官寮多屬望
料知揚震獨情親

九月六日催菊賦得何字

江雨茫茫漲白波
東籬秋色竟如何
十分猶較三分少

九日爭先二日多西子睡濃方斂笑太真嬌重不成酡
花神好雨匆匆發莫負公家金巨羅

九日分韻得壺字

偶逢佳節寄京都家遠親朋一字無睡起晚雲生枕席
雨餘秋水足江湖石城木落砧聲早天塹風高鴈影孤
北望蔣陵纔咫尺不曾與客共攜壺

九月十一日天禧寺訪盧月桐觀畫壁回口占二
絕句以寄

秋路沙晴不起風長干寺裏訪盧鴻瓦棺已失維摩樣
畫壁他年看月桐

月桐不似虎頭癡頗學王維愛作詩煩君滿壁滄洲畫
畫我萍居聽雨詩

望鍾山有懷靈谷濬禪師分韻得靈字

城外鍾山山外寺慣曾看對不曾經東家駿馬客騎去
西土經書亦愛聽何得烟霞回俗客便將文字乞山靈
曉來風雨添秋爽惟見晴嵐滿郭青

送蘭古春往淞江兼寄楊林寺如一庵

訪舊來京國乘流到海濱
梵音三泖雨香氣九峯雲
業是隨緣得名因出世聞
高秋江寺別烟草沒鷗羣

松上好山川曾遊二十年
雲連雙樹下天與一僧傳
海日生齋蓋江華起法筵
楊林煩與問何日買歸船

題東牧青山白雲圖

殘雲近縣山落日遠江樹
潮歸人未歸孤舟伴閒鷺

山居八事詩序

山居八事詩者五雲山人盧東牧志其所居之有也
山在錢唐徐范二村之間盧氏世居之地地宜畊桑
東牧與其弟東野畊田以養母飯牛以共畊故作畊
田牧牛篇脩食也必以蔬已疾也必以藥故作灌畦
藝藥篇飯不能以無茗炊不能以無薪故作采茶拾
薪篇松栢也必栽之竹繁也必洗之故作栽松洗竹
篇詩既成或誚之曰居山者不以麋鹿為禮居澤者不
以魚鼈為禮東牧之咏斯事也宜若無所咏焉可也

余解之曰豳風七月衣食具焉吉日車攻田獵載焉
觀置兔而知其公侯好仇觀伐檀而美其非力不食
上而朝廷下而民俗詩人之辭固不得而廢也雖然
山居者衆矣惟東牧居之而樂之樂之而咏歌之斯
亦異夫他之居山者乎時之能詩者且從而和之斯
亦樂東牧之所樂者乎詩凡若干首余亦和者也思
以樂衆人之樂故又為之序以告諸觀民風者焉洪
武二十一年秋九月既望會稽山樵者唐之淳序

畊田

飯牛每遇夜半犂田喜及春初但祝五風十雨不愁官

稅私租

牧牛

耕雲東塢西塢飲水前溪後溪野老時能叩角家童已

解扶犂

灌畦

飲食秋菰春韭不辭短甕長瓶漢陰丈人知己北山隱

者同盟

藝藥

雲護靈苗勝雪日蒸香氣成霞自擬老來扶疾傍人錯
道醫家

采茶

雨露香生蓓蕾烟霞滿貯笭筍學得盧仝煮喫去從陸
羽修經

拾薪

煎茶煮藥供炊拾薪掃糴歸遲山北山南萬樹斧柯不
到青枝

栽松

道士傳將種法山僧乞與松栽日日閒中愛看不論晴
雨須來

洗竹

節下洗出繁葉向陽留護高枝待取好風涼月不教雨
怪雲奇

送津上人住杭州興福寺

一錫下禪關西湖蒼翠間
路連天竺寺門對浙江山
雨起龍瓶濕雲歸鴿座閒
倦遊嗟我在悵悵爾東還

病起池上作

坐卧對池水西風生白蘋
有家寧免累多病轉思親
客畫醫王佛人分藥竈薪
形骸空自笑輕快即閒人

一齋銘有序

隴西李公子有讀書之室請名于其師白頤庵先生

先生題之曰一齋既為文以記之矣公子復俾余伸其說焉余嘗以為天地至高大也其為物不貳則其生物不測人生天地間稟天地之氣其體即天地之體也其心即天地之心也天以一理賦之於人散而為萬善惟聖人合天下之萬善而全之於一身此堯舜禹之惟精惟一成湯伊尹之咸有一德文王之德純亦不已孔子語曾子之一貫孟子之萬物皆備於我者此也聖賢不獨身有其德而且垂諸經焉是故

易也者一之誠也書也者一之揆也詩也者一之性情也禮也者一之宜也樂也者一之和也春秋也者一之大防也是故君子之於學也觀乎易以立其誠讀乎書以揆其事詠乎詩以得其性情禮以宜之樂以和之使吾身順正以行其義而無越乎春秋之大防焉斯可無愧乎名齋之義矣因為之銘以相其志云銘曰天地之道博厚高明惟其不二物乃化生人生兩間貴乎克一一則無欲靜虛動直在昔伊尹相于商湯咸有

一德訓其嗣王姬文法湯純亦不已參登孔門一貫而
唯下學希聖致禮治躬勿二勿三勿西勿東及其至也
一於恭敬恭則體信敬則達順信體順達禮明樂崇誰其
尸之位育之功有媿公子一名齋室我刻斯銘敢告無數
十月十一日夜登天喜寺塔

九級門開八面風蓮燈點點奪星紅大千世界銀河外
十萬人家明月中自怪躋攀窮鳥道人驚笑語落天宮
漏聲暗與經聲接院院分明白晝同

和答顧庵先生寄示二絕句之韻

住依公府枕河灣
野老王孫日往還
莫道草堂無樣制
聖恩曾許屋三間

鳳凰臺上望莊臺
喜得雲緘手自開
就裏頻頻問鄉信
阿羅三月沒書來

題桐廬孫盤谷中峯先生兄弟墓銘卷後

盤谷先生賢伯叔
棣萼熒熒照岩谷
伯也仕宋不仕元
叔也居家不干祿
一門怕怕服儒雅
講道哦詩化鄉族

白雲原上掃烟霞桐君山中友麋鹿當時故老歌黍離
前代龍頭秉釣軸先生謝病王公起方守再來留相辱
弟兄心事向誰訴釣臺蒼蒼江水綠百年壽考摧棟梁
雙冢青蔥蔭松竹幽光潛德誰所寫阡表埋名耀珠玉
榮名過眼等流電節義於人有餘馥後來孫子亦多賢
帶經鋤田故山麓到今過者仰高風草際碑文再三讀

王公謂應龍方公
謂回留相謂夢炎

江淮舟中雜詩

潮落沙虛星斗光渡頭燈火送昏黃
鹽飛白雪明魚鱸酒熟金甌漬蟹筐
地老猶存千歲塔江寒欲釀五更霜
一年來往經三度淮楚征塵點鬢蒼

短日生寒悶客懷擁衾危坐類僧齋
枕中道路無非越篷外山川盡屬淮
聽得漁歌思白紵著來戎服愧青鞵
雲間木落魚龍卧自笑浮生未有涯

靜裏尋詩不厭舟夜看星影辨牽牛
雨稀雲葉清如鶴浪感霜華白勝鷗
頗愧江湖無報答敢思陶謝與同遊

安能百斛玻璃酒訓練吟兵破宿愁

重至邳州

十月初五日

寥落古邳州州城亂後修青徐開野色沂泗入河流月
冷孤桐夜風高磬石秋從來愛登覽況復是重游

雪

入夜風猶勁崇朝雪正飛自天分物色隨地得光輝清
逼茶烟細寒驚火力微西山可田獵狐兔怯重圍

夜讀門山靜居二先生遺集

月色讓殘雪角聲淒斷鴻從軍泗水上飛夢大江東風
水綴簷鐸隣火送春春臨文懷二老清淚濕焦桐

讀左氏新作

林生本知友勞子及神交螭蟠或在野鳳翥乍升朝文
收藝苑實思擁學江濤懷人對新製客城寒漏遙

雪水烹茶

乞得銀河水來烹龍井茶槍旗開雨葉風浪熟天華
玉液滲雲旗寒鐺獨煮時一甌醒酒困誰道愧麋兒

奉和公相羣齋夜話之韻二首

幕府趨陪舊寒齋興緒新敢邀詩作友寧卜醉為隣月
沒三更夜陽回四海春來朝好雲物紀述定頻頻

節蓋重臨日轅門號令新將才原不忝文字更無隣箭
射張山雪談生羽帳春自慚門下士訓倡敢辭頻

十一月二十日夜陪我公校閱所抄唐人絕句詩

因擬作五首奉獻

姓字從頭數篇章愛好抄唐朝人物盛一一許神交

燈窗繙閱久丹墨校讐多總喜珠還浦誰疑豕渡河
公方耽古律我亦愛評詩首首聽歌起誰占作者誰
讀罷鼓三撾香消燭卸華苦寒除是雪頻起聽窗紗
虎帳螭頭鼎犀牀鴈足燈轅弓收夜月詩硯得春冰

鷹攫鳥呈公相

海西黃鷹雙翅團繡帽錦韝霜日寒忽然乘風張老拳
批殺鷗臬松樹端身輕勢急飛復墮臬鬼無聲鷹眼怒
願公奮翼如此鷹翦除臬獍威憑陵不擊凡鳥誇多能

奉和寄存翁善世之韻

禪心京國寺雲樹大江東
法象超塵外清譚入夢中
朝趨春殿日經禮夜壇風
應喜淮陽信天寒有鴈通

雪中偶成

雪花兼夜復終朝臘日侵尋煖尚遥
絕壑冷飛巫峽雨
遠峯晴湧越江潮
誰憐狡兔空三窟共仰雲鵬落九霄
幕府夜深寒不寐為將文墨事嫖姚

碧落鸞車碾玉塵上方臺殿失金銀
迴風密洒梨園夜

小雨斜飛柳巷春萬國山河同氣色五更星月讓精神
懸知太史占嘉瑞願祝豐年荷聖仁

戲題桐窗

春時桐樹葉幢幢風動書籤月浸窗重到已為人剪伐
一階殘雪吹驚厖

答友人

嶧陽之山看孤桐昔來春初今暮冬天寒日薄河水凍
圯下不逢黃石公州城之南古儒宮老屋數間圍破墉

入門穹碑立四五石黑字青苔鮮紅中有一士瓌而顯
問之姓名無極翁自言少壯取科甲明光奏賦聲摩空
運移世改雙鬢禿寄食齊魯如萍蓬見我揖我邀我坐
示我新詞兼古風讀之琅然合音度如列犧象鳴笙鏞
乍疑淵源瀉江漢浩浩萬里來朝宗又驚百卉競春媚
秀者傑出惟孤松贈我雄文更奇絕組織經史成山龍
俄然謂我古作者愧我所得非所蒙是日積雪明遠峯
夕霞照作青芙蓉空庭馬嘶客當去隣壁鷄啼人曉春

子坐臯比詠芹藻我走南北如賓鴻區區聚散何足恤
獨有道義能初終酬子短歌歌未工凍墨著紙書秋蟲
城南有酒薄如水與子一醉三千鍾下視麤俗猶盲聾
奉懷白先生兼寄二公子方大叅

臨流脉脉懷歸客檢歷怱怱欲盡年公子坐分除夜酒
故侯來渡夕陽船燈前鄉夢煩龜卜霞外仙書倩鶴傳
誰道相違不相憶心同淮泗日泗沿

目病中聞打圍作

新按胡鷹舊雪香三千人馬出圍場自憐患眼寒窗下
高擁青綾夢射狼

十二月二十四日夜憶母親作三首

雲白星稀夜氣清家家祠竈學陰生我方寄食公厨飯
却憶慈親坐到明

去歲還家逼歲除厨人燈火祭更初懸知今夜團欒說
說著邳州不得書

堂上慈親鶴髮垂幾迴空負倚門思定因說向孫兒道

知在京師在下邳

除夜立春

今年殘臘今宵盡
明歲新春明日來
天上列星歸次舍
人間萬物動胚胎
土牛鞭映椒花酒
綵燕風吹爆竹灰
塵世百年驚四十
可堪時序兩相催

歲暮奉呈公相

發春食沂水
歲晏復來茲
如何羈旅蹤
涉歷綿綿時
朝從我公出
馳獵北山陲
駢弓挾白羽
紫燕從文驪
莫歸

戎府閒初月照大旗城近刁斗急令嚴人語稀亦有二
三友攜毫匹書詩鏗鏘節征鼓倡和叶塤篪今夕匪恒
夕歲律行推移作樂陳火戲張燈送瑤卮獻酬豈不懽
終觴前致辭春秋貴謹始君子慎知幾願公益崇德如
彼星日輝上為國柱石下作民耆龜受脰殄凶醜垂紳
贊雍熙惟音和則鈞在器滿乃隳吾人依末耀共仰黃
髮期

唐愚士詩卷四